




巴縣志

全函
十七卷

ル 5
1503
10



1503
10

1503
10

巴縣志卷十五 藝文



解泉賦

王應熊

宮園璧水地壇孔林闕巨靈之粵府濬洪業之巨
浸抱經者鱗集擢秀者穎森人競擅其美富物亦
忘其高深觀夫平鋪靜藻對竦幽授曩屨跡以紅
蘚琅玕冒乎綠蔭神龍或伏而似護脉望未仙而
爲蟬士固類此物亦宜欽乃有南離之子辰宿之

精其將降也莫測其乍出也有情假碧甃之空巖
吐翠乳之澄泓去鱗鱗之腥穴詎蚯蚓之與爭爾
其韜光用晦舍同尙獨漱清寡營類飲簞而已餘
伏竇儼思比戢劍而受讀養蒙坎之冲融甘滌井
之秘馥靜也淵潛動則陽復負魁形爲羣穉所宗
告昌期不假著而可卜笑鑽毀於元龜嗤饒流之
汗犢寧捐彼而取此伍四靈之可畜於是石室先
生豔旃緣之以綺楯考之以瑞驗檢雲子以酌甘
擘霞箋而命槩唱雅奏之連蜷錫珍銘於砌砭已

乃進諸生饜之曰天遠人邇慎占書兮氣至物應
爰居諸兮猗嗟介夫似巨儒兮漸瀆達海去沮洳
兮百家諸子其支渠兮荀楊軻師亦旣濬兮六經
中天乃歸墟兮智弗逮物達識歎兮風騷自命拾
沫餘兮爾雅不熟助軒渠兮匡綏來誚衣裾裾兮
蠓蛄爲奴行睢睢兮犯霧以僵敗貞媵兮交漆忽
解渝本初兮雌黃緝翩戈甲具兮緯蕭澡觸徒啜
舖兮解解相笑聚衆畜兮試酌新水滌厥滂兮諸
生俯而思仰而奮額手以進於先生曰直寬溫栗

公材雄兮爲時龍湫澍維豐兮沃我道腴理黃中
兮舊史氏聞而讚曰斛水之藏靈兮何抱息之深
深兮倘蟠泥而升霖兮貽我以清音兮維邑中之
黔兮

皇清

畫蚊賦

西寧李以寧 雲樵
邑人

天遊先生攜其綠綺問嶽浮湘山川詰曲熊繹舊
疆訪鷄亭之遺趾謝蝸角之名場當薰風之乍動
值夏日之初長陽烏有赫朱鳥其翔爰啟北牖以

納微涼袒裸斗室偃仰匡牀望栩栩之夢蝶驚軋
軋之鳴螿忽撫膺而負痛更捫足而受創匪蘇季
子之引錐何由股刺無霍子孟之驂乘有若背芒
始剝膚以跼踖旋顧影以徬徨乃有物焉若隱若
見載飛載揚沙蝨之射影莫喻其毒莽蜂之辛螫
不異其銜睨而視之厥爲蚊蠱異哉以么麼之纖
細乃饕餮而披猖竟光天化日之不避敢呼朋引
類以方張先生於是招之使前厲色而責曰爾質
甚微爾形甚劣爾不能熠燿之流輝爾不能蜉蝣

巴縣志 卷十五 三
之如雪爾不能蟻蠓之知時爾不能飛蟹之封埵
汲汲訥訥翻翻捷捷弗顧狼貪惟恣鼠竊肆惡聲
以欺人恃利口之喋血何此方之慄悍化微虫之
妖孽伯倫之忽忽難免其噬孝先之便便亦逢其
齧然聞爾之爲類也濕則能生出則有候但卜其
夜未卜其晝俟帷簿之不修或鑽穴而由竇胡白
晝以公行同都市之劇寇聆之或聞索之莫遑瞻
之在前忽焉在後其去颺馳來則雨驟雖柔若無
骨揮老拳而難當倘怙終不悛飽毒手而誰宥蚊

聆斯語嚶嚶其鳴先生之責毋乃過情伊余族類
紛紛訇訇產從蟲母之吐化繇水草之生蚋則稱
殊而派合螻則種異而才并故旣擅忝民之雅譽
亦多白鳥之嘉名聞聲而雷響可聚負重而泰山
爲輕嗟余獨怪夫世之悠悠兮惟高名是驚厚利
是牟也罔龍斷於左右向昏夜以要求搖尾舐痔
之可鄙鐘鳴漏盡以無休若余也不墮冥冥之節
競爲朗朗之遊嘗一嚮而已足效三咽而不留何
先生舍大者而不議惟茲渺焉之來謀先生曰噫

嘻我知之矣肆厥巧言文其利嘴爾乃欺予予弗
眩爾爾睨雖爲焦螟之所巢爾脚雖與鵠頭而競
美爾鳴雖挫鮫人之精爾墜不懼雲臺之巋而望
煙火以疾奔闕朝暮以成市諒宵小之何能惟附
和以致此霸主之開幃奚爲舍人之脫禪有以曷
正閒居之衣冠更防暗室之壁壘任翺蜚盡豹脚
之儔詎銛利若龍文之七翳翳堪哂其暗投營營
徒事乎積毀予將溯洄碧波采擷芳芷聽蝸蟻於
林端蕩蜻蛉於江沚彈清商之一曲覺迴風之四

起醜類潛蹤長喙遠徙坦懷披襟斯害也已

歌樂山賦

邑令 王爾鑑

乾隆癸酉八月晦日熊耳山人于役於梁灘之垣
憩息乎歌樂之山煙消萬井雲淨層巒孤峰拔地
石磴盤天攀藤附葛乃陟其巔東眺巴渝夔萬荆
楚廻環西瞰青神玉壘峩眉蜿蜒闡漢涪嘉龍盤
於後金瀘岷沫虹控於前登是山也胸可拓塵可
湔摘星斗傲倥佯上下乎千古橫覽乎八埏爰顧
名思義歌樂昔傳匪風匪雅無管無絃卽而聽之

空山寂然豈仙歌之有異抑塵聽之無緣求其故
而不得推匡牀以倦眠爾乃夜夢山靈莞爾而笑
笑予汨塵未識至道無形無聲含孕大造形形聲
聲難名厥奧出沒於山水之間隱約乎高深之妙
河嶽効靈現乎龜龍熊耳嵩嶽巍峙天中子乃去
之之乎山東東有滄海無風自震日月含光島嶼
列映子乃去之弗游弗泳梁父壘壘泰山巖巖層
雲澹宕碧霞踰蹇子雖登之未叩其關自東徂西
取道華陰二峰雲障繡嶺塵侵子雖過之未涉

岑南來馭棧劍外是遊錦城三載星馳雲流泊來
巴渝歲逾兩周雲山雅戀心血空嘔乾坤傀儡川
嶽癭瘤亦烏識夫元音之縹緲仙樂之悠悠乎山
人曰鳳凰之鳴鳴以嶰竹律呂之調調以金玉旣
備乃奏神來賓肅六代宮懸四朝樂器聲有正變
器無不備山靈之言道存器廢將何以鳴萬物之
和宣天地之氣哉山靈曰器不可廢樂不可執執
器求樂器存樂逸因樂制器器從樂出樂無所在
無所不在宣於寰中超然象外不見夫青峰插漢

麗日當空樵吟牧唱響答谷風不見夫絕巘雲合
雪飛雨瀉珠碎晶簾玉敲鴛瓦聿聞鳥雀嘯雨啼
晴聿聞蟲蠕草吟巖鳴嚶嚶唧唧啞啞嚶嚶維篁
有韻戛然鳴谷維瀑飛花冷然削玉淙淙琤琤悠
悠曲曲若乃長江夜靜波撼雲湍老樹風搖聲與
盤旋叩之杳杳聽之閒閒若乃松濤泛月碧落聲
送雲陣排空清虛鼓動於焉怡情於焉悅性是惟
無形形由心生是惟無聲聲發籟聞上乃鈞天下
乃奮地維山之歌疇識三昧言求之而難名神領

之而可會山人聽之憬然悟默然退實獲我心喜
而不寐山靈載歌曰孕鴻鈞兮氣渾函洩元音兮
山水閒與子遇兮歌樂山熊耳山人賡歌曰山水
薄兮有清音綿地天兮無古今山靈啟予兮發長
吟

花蕊鳥賦

周開豐

庚寅辛卯讀書白巖小莊齋前海棠每開時
輒有二小鳥大如橄欖雌黃綠而雄彩翠游
戲花閒唯食花蕊花謝不復可見人或以為

桐花鳳之類也因名爲花蕊鳥而賦之

靜居山館遐睎春工各呈生趣大矣陶鎔海棠初
試蕊滿珠宮乃有靈禽日嬉其中其爲物也纖疑
指大細恐風吹其雄金翠其耦黃黎朱頰其領細
素其炷黛緇其距翠拂其翅映日而光輝楚楚微
風而清響徐徐幾方駕於孔翠寧鶯領於留鸚而
其爲致也飛燕乍入昭陽秦宮活於花裏去則雙
飛來斯偕止見名花之睡足而欣欣其色喜數芳
須探香蕊凌高枝巡葉底旣倒挂而旁窺復垂頭

而俯取翔鸞舞鶴行雲飛雨上下任心高舉合矩
雖屢躍而花寧亦驚人而不駛蓋其欣賞之情有
獨摯而其雋新之趣真有莫擬者也乃若其翔非
翳蒼棲必芳株偕海棠而夢化舉錦帶以襟舒新
荷却蓋聚仙結廬蓋將使青鳥傳言文鴛侍書繡
閣啟佳人之妒猶憐我見綵線免金鈴之響竟可
卿呼所惜行藏莫定出處難尋春來餘去空谷登
音恐春事之將闌而歸飛於瑤林將何地以召聞
生而繪茲閨苑之仙禽

千斯門城樓賦

周開豐

伊渝郡之雄麗兮實吾蜀之奧區拊瞿塘以爲門
戶兮倚玉壘而爲負炭塗山嶽鬱延左峙兮嘉陵
右注而滌紆城基則巖縣千仞兮兩江則環抱而
爲湯池世固謂天成之重慶兮寰宇將何地以求
之按方隅以闢重闔兮其西北則名曰千斯金鄉
蓋順成之所兮九秋則大有之期古者因事以立
名兮殆米粟菽麥之所儲上建巍巍之敵樓兮盾
櫓啟閉有攸司夫何年歷久而漸頽兮崇乃見於

畢方肆劫火之憑陵兮自郭外而越女墻融風語
譖而盛作兮江天頽赫以捨攘置斯樓於陸渾之
燠兮宛楚炬之烈咸陽今昔於是殊觀兮風景蕭
瑟而悽惻臨郭一望而心傷兮舉足礫礪而瓦礫
火政除而賑恤行兮先民居之是亟繼斯樓而重
造兮亦體制之所必立召般倖使運斤削兮進庶
工而勤陶甃功不日而事成兮視舊規而整飭邦
君合樂以落之兮氓庶相呼而競集爾其人靜而
囂息兮幽人獨步而徐觀春蔥蔚而夏昭融兮乃

環樓四面之江山雁字斜而水石明兮柳絮起而
 風氣寒回盼丹霞而扶桑始暎兮對卷彩雲而金
 波乍闌此仰瞻遠眺屢變其景而不窮者也乃若
 洪崖在左而肩可拍兮洪崖門下有洪崖洞翠滴滴而飛雨
 北鎮為案而倦可凭兮煙冪冪而曳縷雉齧月而
 微虧兮水含星而不吐兩岸之燈光如晝兮四起
 之歌聲誰譜宵渡客兮一葉輕浮賣酒船兮數聲
 柔艣憑睥睨而屬耳目兮久始歸而掩戶是則斯
 樓之奇觀不與岳陽滕閣煙江疊嶂後先而齊武

也乎重曰太平之世水妃得制偶逸而不害兮斯
 樓既復樂利優渥萬世而永賴兮幽人之觀鴻漸
 于磐寥廓而無礙兮謝雅而逸王憂以備文正則
 伊周之匹兮

飛雪巖賦

李為棟

巖去渝城六十里相傳太白東坡皆題詩巖
 閒風雨殘蝕泯然無存明巡按詹公朝用王
 公非熊里中人也鑿九曲池修九層閣極一
 時之盛遊而披讀殘碣無一留題余授讀此

地披襟常游深懼古蹟之久湮且將爲前人
分過也爰作賦曰

爾乃千村寥廓一水紆迴穿初出之月流九曲之
盃望岑崟而奔赴依蒹葭而溯洄憑地骨以持載
聳山體以葳蕤孰劈巉巖嶄焉中斷誰營石宇敞
然宏開於是千尋瀑布一泓鼎沸泉涓涓而下流
珠顆顆而上激氣拂鬱以蕭疎霧迷離而噓噏參
差古樹托滑磯以盤根三兩寒鴉衝濃煙以振翼
蓋其爲狀也條條正練纍纍貫璣石霑穿而滲玉

塵水凌空而挂璫絲經鬼斧之運風循巖墜屑儼
驪龍之驤首吐氣成霏六飛縱蒼苔而無色三白
濺綠竹以競輝越犬見之而思吠老梅著之而應
肥故刻劃其形而名之曰飛雪其下有潭爲方十
丈皎然澄清汪乎滄泱其體渟泓其色莽蒼映晴
霞以精瑩鼓微風而動盪溶溶兮月光涵灑灑兮
金波響鱣鯉之所泳游蛟螭之所偃仰旁多怪石
塞乎中流或頑或瘦不疎不稠錯綜兮碁局參伍
兮星毬蜿蜒若飲河之虺蜴蹲踞若升木之獼猴

藏深窟之狡兔發幽壑之潛蚪列坐其閒堪盤桓
而撫弄周行其上極崎嶇而夷猶別有洞天玲瓏
深邃礎礪高兮玉鋪天莓蘚嫩兮茵席地浙瀝兮
南宮清漣漪兮珠簾翠墨池筆塚依稀想其規模
石磴礪牀髣髴見其位置流雲之所時侵片塵之
所不至予乃拔履褰衣遶谷而寒茂草是拂長藤
是緣披曲折之徑登磈礪之門濕袍袖而淋漓泉
流雨噴顧人影而恍惚室密雲吞漱激灑之玉蜜
枕礎礪之雲根仰瞻不測之松柏俯窺有本之淵

源既息心而氣靜亦觸景而思存趙郡蘇溪益州
鄭谷地以人而流名人以名而拭目胡此地之無
稱詎殘碑之莫讀豈昔之非今而盈則易覆抑又
聞之故老曰王公閣輔詹公天牧匪載酒以特過
且鳴珂而聚族胡不以是名也豈其人之文章行
誼漫無足錄耶夫連山絕壑古洞長林幸則爲詩
酒琴書之窟不幸則爲荆棘蓬華之陰遇則爲達
人高士之所遊覽不遇則爲山狐野鹿之所嘯吟
嗟取舍之無主嘆顯晦之相等如此巖者一旦許

邁息真長生扇戶綠髮採芝紫煙揮塵躍潭淵以
 以乘龍飛絕壁以化羽則鼯鼠即八公之鷄犬磊
 砢亦三島之洞府且以上之擬乎消槃而遠方諸
 天姥將見來尋幽之屐可遍四方入紀勝之編永
 垂千古

銘

宋

金堂南山泉銘

有序

紹興蒲國寶邑人
狀元

蘭陵錢治嘗作南山泉記實仁宗天聖四年
 距今蓋一百二十有一也錢又誇大其言以
 謂陸羽作茶經第水之品三十張日新煎茶
 記又增其七毛文錫作茶譜又增至二十有
 八金堂南山泉當不在蘭溪第二水下然前
 之三人足跡曾不一履此地宜皆不為所賞

鑿故此泉湮沒而無聞焉可嘆也先朝時家
恬戶嬉一時人士往往多以石泉試茗相誇
爲樂事至靖康後天下騷然苦兵生民困於
征徭邑中之黔惴然方以貨泉供億縣官不
給爲恐泉之甘苦何暇議耶黃君才叔此方
之修整士也紹興辛巳於南山之南手披荆
棘鋤其荒穢卓江山景物之會作屋十數楹
極幽居之勝而岳竇聞泉之湮者復達引之
庭除其聲涓涓遇暇日余率二三賓朋登君

之堂洗心滌慮便覺煩暑坐變清涼酌爲茗
飲則又苾甘可愛誠如治之言者余以是知
造物之廢興通塞亦自有時何獨一泉耶是不
可不銘

銘曰峽水東注鶴峰北峙幽幽南山爲國之紀有
冽彼泉出於岳底清新香潔酌之如醴吾儕小人
豈曰知味宜茶而甘卽爲佳水近世錢治蓋嘗品
第方之蘭溪不在第二陸羽旣遠無復爲記不有
獎鑒孰發其闕

明

銅鼎銘

李化龍

霖寰
長垣

萬曆中總督李化龍平播後命重慶府將軍
前給軍銅鍋盡數收集改鑄鼎器頒發各土
司永為鑒戒其銘云

維星拱北維水朝東天王御極八方會同惟西南
夷各世其封惟敬天念祖庶不墜厥宗順天者吉
逆天者凶以為不信視楊應龍

銅柱銘

李化龍

又命鑄銅柱高一丈三尺鑄銘其上運豎海
龍圍之巔其文曰

皇帝二十有八年播人告訐天皇赫怒爰整六師
以誅不供百十有四日盡俘羣醜遂瀦其宮設吏
治之方三千里始入皇封我勒銅標永鎮西南臣
李化龍

五福宮殿銘

王應熊

繇太清殿後磴以躋為立帝宮厥象範金威
慈肅穆龕與塗嶺竝峻鼎分太和一氣已辛

酉之亂殿毀十年不復而今若假手於余不
佞也嘗試升虛周眺感慨繫之嗟乎此景此
區非名勝秀甲耶而委之草莽可乎哉凡廓
以內蕪未治者無如西南隅上之事宜先無
如元帝之宮余故勤焉謹與於己巳冬中廿
一日壬寅落於庚午春季廿八日戊申鏤銘
於石詩以道志其辭曰

陟彼五福寥天星壇下列萬井印茲冕弁琳構闕
如如顛脫冠試爲理之章甫斯端游觀來云風氣
其完雙流衣帶北斗闌干羣峰新沐獻翠如歡
人亦有言築室道旁衆謀鮮斷百弛詎張我作斯
宇靡峙靡糗驚步不輟與驥同驤學道爾爾多岐
亡羊無畏縮心去人我障事成晏如碧虛滉涼
稽首紫庭微妙元通離情絕想卽色涵空我聞問
道於彼崆峒伐柯不遠淨樂茲宮清靜無爲萬物
以豐

芝楹儼碩茶寮靜嘉羽衣衲士於焉是家步虛清
梵鶴駕牛車非同非異雲樹周遮好種松鬣莫植

桃花

皇清

芥觀堂銘

東水門準提菴客
堂即江南會館

周開豐

佛以神通入三昧斷取世界如轉蓬衆方贊歎不
 思議豈知取斷還虛空是爲芥子納須彌我觀此
 堂將毋同此堂非大亦非小大無不受小不容若
 問畢竟作何觀皆已變滅隨東風我來一坐十小
 劫維摩默默文殊慵墮鈴茶鼎閒自語善哉莫漏
 無言宗

巴石銘

邑令 王爾鑑

在縣署內左亭堦畔又名巴子石

咄咄斯石磊磊其形根拔地厚頂磨天青炎寒一
 碧風雨難傾儼累卵而弗危若蜂房之上擎天工
 耶人巧耶吾莫得而名用以名吾亭

豐年碑銘

王爾鑑

在朝天門外江底一名雍熙碑又名靈石滸
 晉以來皆有石刻水極涸乃現現則年豐明
 弘治改元碑現年饑

豐年碑溯漢唐聿誰鑿神鬼藏潛水府蛟龍護不
數出奧都固出則豐出亦凶頑哉石詎關農官與
民卜豐嗇勿驗碑在修德

贊 率不則息

明

建文亡臣贊

王 詔

松陽今嚴州府王詔嘗游重慶治平寺聞轉輪藏

上有嘍喑聲異之緣視得一書載建文亡臣
二十餘人紙浥爛不可讀可辨者僅九人耳
因各為之贊

梁田玉定海人官郎中與御史葉希賢皆入山
為僧

行儒名釋知我者誰至寶淪沒久而同輝

梁良玉中書舍人與田玉同族易姓名為書傭

鬻書海南

忠臣蹇蹇遵彼海溥耽隱玩世資以盍簪屯如遭

如哀此陸沈

何申中書舍人使蜀在途聞變痛哭吐血疽發

背死

兩巖洶洶中作霹靂意氣憑殷與之俱激奸諛過

此寧不惕息

宋和郭節皆中書舍人變姓名與何洲逃入異

域賣卜自給

箕子陳疇君平賣卜義有從否道有宜告烈烈英

賢寥寥鴻鵠

梁良用定海人變姓名為人刺船

汎汎者舟載浮載沈中流誓楫懷我好音或完我

族或明我心

梁中節定海人與郭良棄官為道士

駕言導引嘯傲林臯頽波莫挽使我心勞

除何洲不知何許人僅九人也

蹇忠定公像贊

王應熊

忠定公蹇原名鎔太祖高皇帝丹筆天書更名義
字賜之後附劉姚金夏楊解諸公讚頌原卷遺失
按先正太師蹇忠定公名昭鼎鐘事蹟備諸國史
家乘若漢之蕭張平勃唐之王魏杜房趙宋以下
姑不實論或有其材而艱於遇或際其時而慳於
福天人契合之微君臣始終之致蓋自古重言之
矣余小子舞象時獲拜瞻公畫像於其家豐堅儼

碩想見國初時鴻龐光嶽真氣篤挺偉人精神淵
穆如高山大河如渾金璞玉窺擬其際冠冕倫類
幹濟樞機圭角靡可尋繹後讀公年譜竝奏狀諸
藁文若詩刻雖散佚漫滅過半而斷寶殘珪緹珍
什襲斯固文獻攸徵後起司責余小子毋敢讓昔
在詞館依隱豐暇因以搜考前聞偶於長安質庫
得公家藏卷廼我太祖皇帝丹筆天書爲公易名
某字一時同朝鱗攀驥附劉姚金夏楊解諸公靡
不抽毫揆藻讚歎揄揚寶筏珠船殆無以喻於戲

都哉日星煥爛雲漢昭回宸奎布懸鬼神周擁楮
墨幾於三百年色澤完好余小子典嚮衣帶敬易
以歸寶之笥中復經三十春秋矣公裔孫名觀者
志振門風雅耽文囿付託有所遂出卷予之津劍
既合人弓無恙斯亦事之極鬯者也余小子尤有
說焉時異事殊風頑俗弊人材之鈍薄國步之儻
囊亦若因之夫統均之席不溫而易寧有如公純
德不貳心之老成四十餘載守毗輔銓衡之任者
乎近代明經博一命鮮不豐屋肥墀者有處心膂
股肱之地令家人泥舊廬而棲者歟函煙墨數牋
予諸弟姪尤不輕假今有是耶余小子聞風於生
也甚晚之日未嘗不惶汗霑浹也善觀者捧公此
卷可想見祖宗盛世君臣溫篤之至朋友和厚之
休可想見名碩致身隱微不忒之儀福祿攸同之
故前修後進相爲無窮所由來然矣古今之不相
及爲不必盡同也鄙聞而興者景行斯行能無欣
附於高陽之閭元愷之鄉與蹇氏奕葉有復其始
者亦必眎是爲魏鄭公之笏而毋下同於李平

皇清

劉了菴先生像贊

李仙根

望其氣商周之彝鼎親其色姑射之綽約學則儉
 歲之梁稷心是寒年之續幕開口無俗既出史而
 入經下筆有情亦鳶飛而魚躍道行於子孫是謂
 乘時性泯於智恬可云極樂痛抑膏粱傳家之寶
 堅奉清白救時之藥非賦光霽之襟懷安滌詩書
 之糟粕至於藤杖方袍豈真跣趺行脚蓋冥冥之
 翔鴻亦矯矯之雲鶴既不可得而測寧有法之可

著彼望而許者謂豪傑之退步我見而知之信儒
 門之澹泊

頌

皇清

重修府學泮池落成頌三章

王爾鑑

我瞻黌宮思樂泮水維渝之類水綠山起三江環
抱萬峰羣倚嶰湧靈泉荷呈連理肆昔人文坊表

林峙

我瞻黌宮泮水涓涓址侵闐闐垣斷塵煙蕭艾支
蔓芹藻失顏我邑人士羣力協捐湔彼渣滓浚此

清漣

我瞻鬯宮泮水漣漪石垣雲起水面風吹日月光
 含芹藻香披爰樹之蓮君子是期人文復蔚邦家
 賴之

詩四言古

夏

塗山歌

吳越春秋曰禹年三十未娶行塗山恐時之
 暮失其制度乃辭云吾娶也必有應矣乃有
 白狐九尾造於禹禹曰白者吾之服也九尾
 者王之證也於是塗山之人歌之禹因娶塗
 山謂之女嬌

綏綏白狐九尾龐龐我家嘉夷來賓為王成子室

家我都攸昌 一作成家成 天人之際於茲則行叶

明 叶 矣哉

周

江州詩四首 載華陽國誌

其民質直好義土風敦厚有先民之遺故其

詩曰

川巖惟平其稼多黍旨酒嘉穀可以養父野惟阜

坵彼稷多有嘉穀旨酒可以養母

其祭祀之詩曰

惟月孟春禩祭彼巖永言孝思享祀孔嘉彼黍既

潔彼儀惟澤烝命良辰祖考來格

其好古樂道之詩曰

日月明明亦惟其名誰能長生不朽難獲

又曰

惟德實寶富貴何常我思古人令聞令望

按右四詩在周封巴子建國江州後春秋時蓋

其文有周之仲世語且歷書魯桓莊文哀等公

各年中巴子所行之事可知也

漢

安帝時巴郡太守連失道國人風之曰

明明上天下土是觀帝選元后求定民安孰可不
念禍福由人願君奉詔順德日親

五言古

漢

永建中泰山吳資為郡守屢獲豐年民歌之曰
習習晨風動澍雨潤乎苗我后邇時務我民以優

饒

資遷去民人思慕又曰

遠望忽不見惆悵常位個恩澤實難忘悠悠心永
懷

桓帝時河南李盛為郡守貪財重賦國人刺之

曰

狗犬何誼誼有吏來在門披衣出門應府記欲得
錢語窮乞請期吏怒反見尤旋步顧家中家中無
可與思往從隣貸隣人以言遺錢錢何難得令我

獨憔悴

俱載華陽國誌

唐

嚴孝子墓

劉灣

至性教不及因心天所資禮聞三年喪汝獨終身
期下布骨肉恩上報父母慈禮聞哭有卒汝獨哀
無時前有松柏林荆棘結蒙籠墓門白日閉泣母
黃泉中草服蔽枯骨垢容載飛蓬舉聲哭蒼天萬
木皆悲風

宋

輓制置使張珏

郡守劉堽隴西人

坤維拓提封形勝古天府血戰五十秋零落餘八
柱江南傳箭急誰暇此回顧落日古渝城仗鉞乃
甚武天東甌雖墮吾自強支拄渡瀘躬討逆歸來
戰彌苦蕭條下夔門機穽伏中路咄咄快敵仇誰
與掩抔土哀哉關西雄國亡猶不負同時督軍將
腰金插雙虎

明

九龍灘

推官朱嘉徵岷左海寧

渝城日日雨雲亂無處所有似東西人乾坤同逆

旅平明肅嚴駕解纜及停午放舟清江曲灘聲闕
如虎牽竿泝九龍石立紛然怒雨歇江波澄髣髴
鮫人字淚盡日南珠臨淵不得語

蓮峰三灘

朱嘉徵

三日下渝江石勢如逐鹿峽水咽不流泝舟何刺
蹙秋雨未收潦金風一以肅客子思授衣號寒歌
獨漉獨漉不可歌水深而泥濁上灘復下灘世事
如轉軸長吟續短吟柱絕還成曲

龍門灘

朱嘉徵

瀟瀟發凡江鬻沸龍門首江光何激盪晴峰出其
右巖壁林如黛騫虜結戶牖或黃或丹朱結綠亦
時有了了巖上林白雲相與久此是龍門灘巴峽
鎖其口咄哉古人言扁舟落吾手

溫塘峽

四川僉事劉成德蒲州

我愛溫塘峽峽水一何深上有溫泉水下有青竹
林竹可以為杖泉潔空人心氣歆無凜秋熙然常
若春我來思澡濯庶無異患侵采彼堅中筇恃杖
扶吾身奈何薄奔駛望巖不可尋

皇清

巴字園屏跡

林確

生以過役勞衣以常著敝我思古哲人于物鮮所
係夙夜勇內求如農耽租稅時若吏叫門敢聽豐
歉歲花禽隨變節崦嵫任啟閉藜葛加諸身拙于
辦新製放意尊古春方塘一鼓柅

王貞女二首

李以寧

嶧陽產孤桐巧斲含宮徵爍爍黃金嶽纖纖動玉
指文錦裁爲囊拂拭待君子一彈別鶴吟棄捐不

能理人命若蟬蛸所思在藹正但持方寸心何論
生與死

湛湛薤上露烈風何飄揚冉冉園中花白日無晶
光悲哉未同室玉樹逢摧戕摧戕且勿道眷言念
高堂舅姑歲云邁甘旨疇爲將大義安可辭黽勉
事趨踰茹荼誰鑿只泣血呼穹蒼

游溫泉寺浴罷讀殘碑有江上雲山小三峽燈
前風雨一孤舟之句感而賦之

李以寧

江水經合陽噫嶙鬱然萃峽程三十里瞿塘不少
 異蒙密祇窺天嶄削若無地就中有佳境橫雲樸
 空翠橫舟林藪閒攀蘿陟蕭寺丹青半欹傾堂廡
 尚幽邃流泉陰火烹春寒氣更熾解帶坐清池竟
 日洗塵累摩挲寺門碑剝落莓苔字佳句一以吟
 低徊動聲嗜緬懷昔人遊風雨饒興寄詎知後來
 者隔代遙相企我將鼓煙棹東下增離思潑墨拂
 紫苔聊為斯遊記

冬日遊縉雲山

邑處 何仕昌

晨起步山腰冷冷飛玉屑相將遣愁懷非欲探奇
 絕倚樹聽松濤劃苔觀石碣偶逢鶴髮翁留醉藤
 蘿月

石井坡 在白巖小街石上

重慶 魯 岱人岳

生成山是石窪處一泓泉歷夏常不竭長清上映
 天我雖不能飲對之心灑然

滾柴坡

魯 岱

直上凌層雲陟落墮懸水采樵愁負肩于役怨行
 李往來顧紛紛終古不能已

華巖寺小憩

川東

王孫蔚

茂衍
臨潼

鞅掌疲征途沿溪尋古寺勝遊亦何常乘興偶然
 遂青松欲插天碧柳還垂地香生優鉢花飛泉時
 操騎迎面峙中峰羣巒各軒輊捫蘿步丹梯絕頂
 琳宮闕謂當近山門林深路忽異稍覺鐘聲發瞿
 曇相引示振衣禮白雲投足入不二薈露浣塵顏
 畧說西來意理應在阿堵生公講絕轡白社結儒
 人黃龍解書義古月上巖扉空山竟忘寐

輓王貞女

并序

邑令

孔毓忠

曲阜

予治巴三載餘矣往往案牘中有夫服未終
 而謀奪其寡女者亦有未經結褵一旦壻死
 而夫族母家相與爭售而評訟者風俗至此
 殊厭聽聞謂是司教者之政令未敷以致鄉
 里愚氓不諳大義使兒女含垢貪生乃爾然
 非論於禮樂傳家如王貞女之為乃世所僅
 有者也貞女秉鐸綿州咸宜先生之仲女也
 幼事父母至孝許字郡博曾君之子王將嫁
 而王天貞女隨父任綿州訃音至貞女輒欲

赴弔父母以未諧婚媾且道里云遙委曲勸
阻嗣貞女恒泣向父母曰女子從一而終既
字曾氏今死焉忍背之願以叔之子爲嗣今
當以婦代子職如不遂女之願惟死而已父
母姑從之及咸宜先生丁艱歸里治喪畢女
促父母送之歸父母知貞女志不可奪偕親
屬送歸曾門拜哭壻靈謁見姑舅無不中禮
三日後卽操蘋蘩晨夕定省視膳一如在家
事父母焉邑中紳士嘉其志廣採歌詩以表

獨行閱余孝廉所著貞女序皎乎白日之光
烈乎秋霜之清泊泊乎江河之迅直峩峩乎
崑嶽之崢嶸噫貞女之志良苦矣予揆諸婦
人從一之義自古難之卽撫孤守節大都在
中年晚歲若少而孀孀而無孤可撫其難已
倍之矧未嫁而孀孀而無孤可撫而能矢志
不移若貞女者可傳矣貞女之芳徽懿行旣
生閨閣之輝且激世道人心之勸寧第我巴
人士昔日之謀奪爭售者聞風知愧則凡有

教養之責者莫不樂於聽聞而為之起敬也
又聞咸宜先生系出瑯琊乃吾魯比隣曾君
誼切通家與寒門世好能不按節歌之他日
被之絃管以為風世之一助與

南山有鳥翩翩其翼一雌一雄將棲將息雖未同

巢天之所匹

一解

求之不獲於心悲傷潔毛羽兮自

惜審寥廓兮高翔眾鳥喑喑義不復雙

二解

王氏生

好女煜燼揚清光在家奉滫瀡待嫁調羹湯未得

調羹湯伶俜稱未亡

三解

慈母愛弱女壻亡僅汝身

夜夜愁雲黯淒淒冷析沈牀角無兒啞啞啼霜晨

月夕同誰辛

四解

致辭對阿母兒身已有歸許作他

人婦漫言鬼其餒兒心自有主不必苦折摧

五解

娘

應知女志含淚相摩挲欲燒頭上簪欲裂襟底羅

青松白石矢靡他

六解

歲月洵逝邁奄忽已四載今

日歸里門何不早于歸父母不可留送之歸夫宅

入門雙淚揮哭倒靈前地流盡眼中血訴出心裏

事代借旁枝延血食勉扶持慰夫地下兮夫豈知

七解

易服拜舅姑舅姑重嗚咽新婦何區區早寡無

兒難獨居事宜慎厥初媳言志已決今日歸來非

虛說八解堅烈之性古丈夫透爪穿齧何足怪生衾

死穴夫婦愛女兒未嫁愛安在從一而終不可再

原其心已在生死外九解予聞兩儀判三綱陳父子

夫婦君統臣廻幹造化敘彝倫用告今之人砥名

而礪節毋輕憫與巾十解

王貞女

劉慈

共姜賦柏舟兩髦維我儀胡靜稱未亡短髮剛覆

眉節義固性成安用緣飾為視彼劓鼻人尙有恩

愛詞誰知王氏女矢志能如斯弱齡失所天之死

不可移父母豈不懷而長膝下嬉舅姑豈不事而

乃泉穴隨大義絕牽緣于道始無虧卓哉此貞操

千載難與追

王貞女

余德中子龍 孝廉

自古重綱常節孝無逾此扶輿鍾正氣祇今能有

幾鬚眉慎品行鬢笄肅風紀淑德秉堅貞頽波賴

挽起吁嗟貞女賢倦言在巴里言動協女宗行止

準書史媒妁訂盟言從一而已矣未嫁喪所天激

烈屢求死父母勤防護從容誓循理涕泣淚不乾
縞衣却羅綺素車往夫家以婦代其子移孝事翁
姑捫心轉覺喜悠悠抱明月畢生事乃已嗟彼貞
女賢往哲堪媲美茹苦允安貞總以成其是

紀羅孝女奇行

庶常主事 杜鶴翽 羽豐 忠州

江水下三巴天然結成字有黨號儲奇生人真有
異不獨在鬚眉乃鍾羅氏妹自幼擅孝名失怙惟
母事年芳逾及笄忽復隕所恃誓以死相從持几
如生侍嘔盡心無血慟深魂應墜至性由天全非

關學所致千載屹合流曹娥斯爲二

巴江夜

徐啟後 會村 海鹽

推篷見新月贈我光一痕何處桂方華有時香可
飡水挾露溥涌徑以榕陰昏南望殊迢遞家山夢

孰論

題丹鳳石

郡守 陳邦器 蓋平

石在郡署青蔭軒前堅蒼矯首形如噉鳳前
人題刻甚夥年久字泯惟康熙四十七年蓋
平陳公所題苔痕半掩諦視之尙能成讀亦

貞珉墨寶竝壽也

異質自天成危然居大塊萬物有消長爾獨無窮
敗泰山何崔嵬惟子常礪帶尤畏卞和識放形石
勒怪更羨何所奇能令元章拜

溫泉寺

重慶 朱世恩 石亭 錢塘

停燒登古刹直上翠微頂此中有溫泉曲磴雙池
竝梵宇迴且深煙雲繞層陰石碣苔蘚封斷文杳
難尋泉聲響碧落清流聞素琴遊人競沐浴咸曰
去瘡疾我疑修煉者丹竈火未泯仙源不可攀磔

碌塵世閒一特萬慮絕頓忘孤舟還

相思寺懷古

龍為霖

古寺號相思厥名迴不常原未可思議何用九迴
腸若問思者誰言之笑欲狂載攷古遺蹟乃在縉
雲旁軒轅鑄鼎處喬木森千章中有相思樹挺幹
拂雲長因以名其寺歷久猶芬芳那期膏自煎斧
斤遭毀傷秃如僧薙髮安問紅粉妝吁嗟古名勝
大半多杳茫空名聊復佳風流千載揚感此發長
吟蘭若爛生光多情更相思引領還西望

梅桂墨竹

龍為霖

秋陽方酷烈胡倏驚風雷由來周郎竹潛驅暑氣
 回腕指所至處颯颯清飈吹蕭疎三兩莖滿室生
 寒滅白壁蛟龍走素練雲雨垂想見湘江千清淚
 滴筠斑能使江水冷且令江月寒妙意口難罄一
 一筆底傳憶昔文湖州名以畫竹揚維時東坡子
 韻事相頡頏聞說兩先生原係中表行念我與梅
 厓亦日舊親屬兄久擅此技不讓古人獨竊慚拙
 繪事未由步芳躅蘇公嘗有言無竹令人俗傳禪

豈俗能不在摹嶰谷梅厓潑墨時畫竹乃非竹此
 中有真性其人本如玉

懷漢孝子杜孝

龍為霖

維古蜀與巴江流禹所導一水雖相通遠隔千里
 徼巴有杜孝子役食錦江隩得魚欲寄母竹筒隨
 水漂再拜祝水伯願母得而嚼此言誕且迂聞者
 應發笑誰期婦出汲竹流恰亦到取以膾進姑謂
 此夫所效由來孝子心直通神靈奧縈紆幾江沱
 絕無一旁撓從夫入婦手宛如面相召浮世風俗

漓承歡鮮服教一室尙勃谿千里遑計較感此念
 古人俯仰深歎悼德陽漢姜詩明發性獨造妻龐
 氏亦賢神魚涌泉竅卓哉與杜子東西互輝耀杜
 妻豈遜龐與夫心遙照惜姓名不傳徒令懷杜孝
 戊寅初度日登塗山絕頂作

什邡 胡德琳 書巢 桂林

舟中望渝城塗山若竝轡及至登山頂城廼在平
 地大江滙嘉陵曲折真成字春城十萬戶屋瓦如
 鱗次一葉浮中央斯語洵非戲山前翼飛亭後塌

藏古寺龍門海棠溪左右張兩翅石紐遠莫攷禹
 廟近可至緬想元圭人後作莫能嗣辛壬與癸甲
 過門日纔四哲人不謀家神功或有異俗說空紛
 紛何必論真偽庚寅吾以降漂泊心自媿父櫬敬
 扶將母難適相值換舟因滯留勝遊偶然遂僧房
 見殘梅折多苦顛顛紅雨霏落花點點明血淚援
 筆申此章一寫騷人思

巴署靈湫 通志名清水穴在署右山麓黃葛樹下石竅泉湧四時不竭

王爾鑑

官衙傍山腰老樹根盤石石罅瀉靈湫漉漉鳴不
歇在山泉水清日夕飲寒冽接竿灌厨竈燒松時
沸雪觸石興寸雲化霖孕江脉藐茲寄一隅永泛

巴山月

金剛坡望梁灘坝

王爾鑑

渝州山重山田疇頗逼促金剛坡頂望梁灘豁吾
目三坝二百里川原最稱沃兩山朗然開溪水中
盤曲山閒泉水活田閒冬水足稻穫明鏡開參差
映茆屋古木棲寒鴉村墟抱綠竹更喜醇樸風家
家勤耕讀下坡弄吟鞭爲賦淇之澳

華巖寺

王爾鑑

披茸訪靈境溪壑石徑曲蜿蜒十餘里始抵華巖
麓蓊葱密雲林竹樹森以綠萬籟寂無聲飛泉響
空谷入門禮世尊僧衆若幽獨太古敦元化於茲
識太樸秋風爽然來丹桂香馥馥我欲息形役結
茆采山菊

華巖洞

王爾鑑

飛澗度山梁絕壁森奧府幽恐神鬼驚磋商石若

穹深洞陰風來颼颼灑靈雨茲巖渾沌初聿誰鑿
太古老樹挂巖唇白雲生石塢旋愁地軸折却羨
巖鳥舞到此無點塵懸空走鐘鼓

曉發龍藏寺至石船場山行作 王爾鑑

雨歇鐘磬鳴五更發猛醒出門陟巉巖霧濕沾衣
冷白雲斷山腰忽復沒山頂綿亘但一氣渾與地
天永朝曦露微熹雲斂出青嶺迤邐亦何長分類
獻清影峻坂下急湍濺雪光炯炯山水互明媚秋
風遊子靜行行三十里小憩尙延頸

贈前潮州太守龍爲霖

王爾鑑

昔余宰滕陽瞥遇高爲阜高子江右豪排闥握余
手萬象羅胸中雄談撼星斗自言入徐魯英名莫
余偶兼索余詩文咄咄不住口又言物色才海內
得兩人東魯王元樞西蜀龍爲霖位余鼎而三把
盞傾素心我嗣牧濟州元樞未曾見渠時官粵東
頻遺我詩卷月夜每讀詩丰采如覲面惟有龍太
守寤寐空眷眷及到西川時風雨近相思萍踪滯
錦里不得一見之幸承乏巴渝一見開襟期高情

淡軒冤娛此柴桑籬嘉行重閭里品卓而自卑下
帷潛著書乘興高吟詩回頭想高子洵哉不我欺
紀言表芳型永作來者師

明月峽

王爾鑑

誰鑿江壁石孔竅圓通天嶽峯嵌碧落朗朗明月
懸噓吸走風雨吞吐穿雲煙雲煙風雨息清光生
波瀾何須然犀燭怪物不敢潛春風宕我舟滿載

明月還

過重慶

乙亥正月初九日自京還渝有黔江之行

王爾鑑

去年正月三策馬離渝州今年正月九買棹還渝
州屈指已逾歲奔走萬里遊渝州與京華兩地懷
殷憂薄宦廿餘載衣食不自謀惟貧亦何病仰面
人可羞所幸重歸來盡室解煩愁士民喜我來迎
我到江頭友朋喜我來執手話綢繆妻兒聞我來
爲我調膳饑我來謁上官治酒欸我留欣茲內外
洽稍俾心神休遽念無定居飄飄萍梗浮五日石
城去雲路多林邱簡書良足畏聊以供探幽我生
七尺軀竟爾如贅瘤欲報生成德壯志媿莫酬引

鏡窺華髮歲月如川流

朝陽山行

王爾鑑

一葉下朝天幽逕登彼岸朝陽應鳳鳴
凌碧多竹箭叢篁護幽巖林密人不見
披林翠霑衣沿磴危陟巘不于曲且高
林開忽天現茅屋三四家欹斜傍巖建
竈煙上青冥木葉響空澗斷橋水聲鳴
懸壑雲影亂邂逅得初心信哉山水縣
我詠韓子言臨風冷然善

桶井溫塘峽

王爾鑑

我愛山中趣其趣在彌惡不惡趣不佳
人尚可著脚桶井行溫塘兩山互相錯
疑眸一惆悵人馬都無著桃源溪水來
花片時隱約乃覓漁父舟一線入洞壑
森岸棕蕭疎迴漩水噴薄猿向雲中挂
瀑從樹杪落雙壁剪長天陡峭聿誰削
迎面忽路絕轉峰忽天濶冷然了凡慮
游神契冥冥

懷漢孝子杜孝

周開豐

至性非可假愚賤尤獨造吾州有孝子
是為漢杜孝力作以養親遠在錦官道
筒魚投諸江江水流

浩浩不計肥與甘只緣供母好妻汲適逢之粲然
 為一笑此必夫所寄破筒魚出跳作膾為加餐慈
 顏幸無誚噫嘻吁此事雖尋常可以窺天道江流
 千里餘安保魚能到妻見偏識之竟爾遂其孝確
 乎一片心默有為之導噫嘻吁世上誰非毛裏人
 赤子天真隨處耗甚如梟鏡不堪言白首吞聲向
 蒼昊緬惟德陽姜湧泉近厨竈渝復有杜君後先
 同輝耀藉非此等人何以扶名教感之為作歌竿
 烏豈同調

聞鵬嘴巖大雪為之灑然

在江北里謝家埧

周開豐

久思淨聰明置身岷山顛岷山多絳雪餌之可得
 仙自顧非仙才存想亦徒然但願一飛灑含滋潤
 麥田斗室亦復佳助我梅花妍皓皓界天白皚皚
 落我前舉酒與之對鶴擎何翩翩乃自新灘遇不
 見且三年昨聞鵬嘴巖勝六此盤旋瑤簪閒琪樹
 圭方而璧員吾雖不及見聞之心神騫塵胸聊一
 洗藉耳為良緣莫謂不及見宛在高巖邊聞聲而

相思殊勝見者賢

表忠石

邑貢劉會以文

俗名紗帽石天啟時合州鄉官董盡倫義師討奢賊孤軍援絕沉江而死人於石上刻董公死難處以招公魂

造化生此石應為董公儲公來敵王愾人石兩不孤上鐫死難字江水為之紆磳磳勢傾側極力神相扶緬彼望夫者不轉猶嗟吁此石苟見泐造化將焉圖

九日飲渝州書院

邑太學生俞德修道

今日是何日登高意相屬連袂尊清幽書齋起神肅雲開戶前峰酒泛籬邊菊菊香和書聲悠然會心曲何須佩萸囊即此延遠矚想見落帽人高致詎能束

渝州十二景

川東張九鎰橘洲湘潭

金碧流香

飲虹瞰江水照出金碧岑芙蓉千萬疊愛此一峯深嵐翠潑高閣天香吹素襟悠然坐縹緲如入蒼

葡林

洪厓滴翠

手拍洪厓肩洪厓渺何處洞壑認仙踪多為傳記
誤清氣抹山光非煙更非霧四面空翠來沾衣撲
不去

龍門浩月

石扇劃地軸一澗流淙淙誰將青玉鏡挂在蒼鱗
龍俯看波上下波靜影相從舉頭問清影銀蟾隔
幾重

桶井峽猿

峽口入幾許潺潺弄迴溪溪深不可泝中有青猿
啼波涵倒挂影動岩碧玻璃水窮問前路仙源景
不迷

字水宵燈

結字不用書江形會意領日夕萬家燈銀樹翻波
影水月與鏡花靜者發深省何如不夜春一片花
明錦

黃葛晚渡

江村圖畫中夕陽半明滅老樹旁屈盤垂蔭幾十
尺去權破殘霞迴帆挂新月四顧但蒼然長嘯江
天碧

海棠煙雨

名山襯名花綽約如美女有時眉黛顰垂綃坐紅
雨寫態不寫神山靈詎我許借山詠海棠笑爲少
陵補

縉嶺雲霞

山氣化作雲山與雲一耳雲去山色青雲來山色

紫向夕映飛霞散爲澄江綺紀勝付風人得其趣
而止

雲篆風清

秀削出層嶺仰眺但閒雲卷舒窮而曲宛然成篆
文忽復微颺發空淨無餘氛誰能御風去翛翛羽
鶴羣

華瑩雪霽

渝州無積雪冬日但輕寒胡爲花六出一夕遍林
巒玉塵亦戲爾堆作白銀盤詩情在澹遠寫入朝

川看

佛圖夜雨

雄關鎮法界一粟藏大千散作天花雨瀟瀟巖壑
邊如膏復如織永夕聲珊珊然臥聽茅茨裏山人眠
未眠

歌樂靈音

窈窕羣峯閒萬籟忽奔放仙飈自天來澗壑發清
響琅琅竹玉幽謾謾松濤朗彷彿子晉笙緜嶺驂
鸞上

七言古

宋

信相院水亭

馮時行

青天行月地行水水月相去八萬里天公大力誰
能移月在水中天作底我心與月明作兩月行本
在青天上雖云佛說我別說恐落衆生顛倒想少
城城隈佛宮闕客我水月僧饒舌三月水寒梅花
時起予對月賡此詩

明

系

七古

題溫泉寺壁

甲戌勦流寇至此書

四川巡撫劉漢儒

大成

三月興師疾如鷲好風吹我舟之軸江聲浙瀝曉
 霞明江水噴薄渾如輓瞬息萬狀不可言高者低
 者山之腹巨如丈人美如姬瘦者偏嫌肥者肉繩
 繩小徑鳥難過樵子持柯尋猿宿健兒報道曇花
 開雲閒直上有天竺攝齊仗劍叩如來何事蒼黎
 遭荼戮試問誰戴進賢冠一身積誓千家哭上帝
 降罰罰我躬免使閻閻盡死髑頭陀披衲撒脚迎
 羞殺宰官著戎服溶溶有水煖如湯激我熱血濺

飛瀑可能徧灑三巴閒借與流離洗瘡痍

送胥澤洲計部使餉薊州便道還巴中

閩部香應無因當魯國 詹事 黃 輝 平倩南充

太倉門開冷雲濕赤囊圭刻風雨亟天子驚傳索
 馬價馬神夜向錢神泣鑄金爲馬易消磨馬化爲
 金足轉多健兒無事日食馬馬魂暗訴諸陵下此
 去脫巾難料之向來懸磬誰爲者火雲燒海海骨
 露中州千里無青樹去京千里日蕭條使者流民
 共愁路憐君盲暑著征衣猶喜輪軒得暫歸愛君

不忍強君酒心與白日同西飛茫茫天地一徽纆
正恐予歸君又出且憑傳語慰鄉人礦稅終須有
停勅

桂園老梅

白岩登雲橋右

庠生

傅大夏

邑人

桂氏古梅氣倔強凌寒花作朱霞標殘碑言種自
隆慶老幹橫撐閱四朝祿祿日看朝菌腐翻翻時
聞暗香飄無因常得園中醉杖策頻過登雲橋

皇清

渝城歎

劉道開

渝州城三面石壁一面平渝州破一面烘開三面
墮賊入城天地昏磔親王及撫軍撫軍乃自取親
王徒送死青天白日忽然霹靂賊與雷約再鳴當
釋雷乎雷乎胡竟寂同時五萬蒼生血流赤渝州
城空嶙峋土偶爲將燈草兵飛樓傑閣頃刻崩睢
陽玉壘是何人吁嗟乎睢陽玉壘是何人

高門行

劉道開

高門成高門壞三十年閒生變態當時騎馬不敢
過何況乘輿竝張蓋門外青衣意氣橫門內主人

宮職大電光石火不須與海市蜃樓竟安在春風
蝴蝶飛過墻貪他一院好青菜君不見汾陽之府
改爲寺馬燧之宅化爲園古來甲第盡如此何必
歛歔嘆此門

大獄歎

劉道開

相弟王應熙擠公子倪天和激衆叩闥破及
千家也

翻天覆地鬧如麻紛紛抄劫侍郎家借問侍郎有
何罪生兒不類招衆譁一封奏上九重准本頭遠
來勝晝錦營謀積聚許多年毀巢取子在俄頃慘
如岸賈入下宮烈似吳兵破楚封抱衾未免妻妾
辱胠篋豈惟財帛空駢柳疊鎖趨犴狴腹心牙爪
立名字羅鉗吉網應募出殺人媚人等兒戲白頭
老子泣斜陽僮僕散盡身郎當空庭有鬼拋磚瓦
破屋無人送米漿繡衣使者惟將順曲直是非焉
敢問侍郎攔街跪不憐夫人升屋喊不聽滿城占
風望氣徒一時化作假虎狐階下果然多子密坐
上何曾有灌夫時移勢異應相讓未必無風能起

浪介弟雖然善推敲誰其主之大丞相丞相耳目
密於鱗開口不如閉口人相逢且謹不平語此語
若聞丞相噀

王長山射虎行和高君霖韻

劉道開

東達監司舊桓尅善射可方北平守雙鞬兩袋馳
驟閑眼如曙星膽如斗青旗白馬闌州來吹角鳴
笳屯谷口年來土曠人烟稀天未黃昏於菟走負
隅伏莽窺行人磨牙吮血恣攫取帳下蒼頭出採
薪須臾墮羿成烏有主人聞之髮指冠小害不除

亦孔醜躍馬彎弧躡跡尋穿林越澗窮其藪回首
招呼射聲士入穴取子能從否陰風浙瀝萬壑號
朱衣化去良非偶白骨成堆不忍看宿孽所遭將
誰咎徐視骨邊有遺金拾入囊中懸馬後天餘此
物助投醪何必棄之如敝帚金精消滅俚鬼逃從
此閒閒耕十畝邇來殘月挂松枝箕踞瓊瑜豪飲
酒

廢宅行

劉道開

曾見豪家興土木遠近搜材如不足經營歲月工

始成觀者嘖嘖羨華屋門高豈但容駟馬騎馬過
門喝令下更有乘車下車遲孟浪動遭閹者罵鄉
里尋常不敢窺入門已少升堂誰除是春風新燕
子無知乃敢壘梁泥一朝賊過官兵繼官兵與賊
元無異主人雖掌討賊權無餉無兵遠遠避高門
大宅無人守悍卒橫行恣躡蹂先拆樓板修哨船
次因號火零星取東傾西倒助摧殘會幾何時無
一椽追毀舊懸金字額天恩存問亦徒然君不見
蹇大師六朝相業符臯夔府制狹隘僅容棲至今

幾度遭兵燹孤亭猶覆免死碑

哭經略容藩公遇變

余

君維

列帝開基千萬禩世運於今號末季櫓槍四起犯
神州逆獻乘危虐內地由秦而豫入西川紛紛僭
據幾經年公以元臣佩鵲印力扶社稷定天傳歲
屆丁亥已三秋壯志矢將逆孽收勳著三匡期奏
績壯猷方略獨公優不憚崎嶇來楚蜀是時諸寇
正四出議逐議安議招徠經營就緒如掌握已丑
秋中鎮夔關欽飛健兒擁控弦拜封酬庸士氣鼓

捷獻南浦若天然舳艫曳纜靖涪陵天險巴渝膽
自傾一時改頭換面者概行矜恤與維新滿擬勞
王事有成誓同祀逃掃妖氛不使黃雲埋戍草忍
留白月墮山城何意浩然長不起痛惜公心今已
矣公業未了心未休公心未白心不死會記單舸
入巫江師臣握手語激昂雪迹明心昭罪案丁寧
諄囑共勤王赳赳桓桓如峙立題封三爵不敢惜
人情反覆似波瀾薦墨未乾頸血赤吁嗟我公兮
幾回陪歎幾悲泣封豕長蛇正四逼不憤大義約
同仇如何一夕戈矛及雲安山頭霖雨生雲安江
水淚長鳴廉遠天高知莫達止留三峽有猿聲凜
公義氣不敢當哭公恩遇不忍忘抒悃布詞歌作
誄公烈永垂流芬芳

送陳公子還閩

余 价

先撫軍陳平人衣也逃之爲釋辛丑夏晤於
淪城力勸遠里賦以送之

岷山高錦水長山嶽崎水晶茫從來蜀道擬天上
夢魂遇之猶愴恍陸必窮巔始見雲纜牽瞿塘飛

百丈昔隨文旌指東路城郭烟邨看如故甲申寇
焰烈龍門倏忽艱難頻國步爾時先公蜀所倚文
章有用節義死於今正氣附塗山凜凜握拳與咬
齒一轉眼兮渾滄桑會問天兮未可忘君飄一衲
雲水鄉我亦浪跡別瞿塘自憐四十鬚白早心旌
忡突每顛倒屈指風萍二七年近來始憶故鄉好
通印子魚月溪夕素飡何必分香積好歷黔嶺撥
楚蕪葦羹久熟臨漳驛

哭伯父默渝感死難

黃平 李竣 鄴 墊江

率土何莫非王臣竟議棄蜀與黃巾從茲夔門遂
失守家家挈子攜妻走銳意獨欲赴渝州謂扼全
省之咽喉致書當事請效命矢心戮力拒梟獍當
事即日有報書願假同舟資掃除捧讀一過砍案
起宗族流涕勸莫止慷慨別族誓死行自送百口
入孤城入城欣受花門鑰晝夜登埤指方略流逆
忽至鬼魂哀驅民掘墓負版來立版縱橫抵牆脚
空懸矢石無勝着突穿地窟用火攻轟雷擊處倒
崇墉執戟官軍倏然潰軍中鼓死無人播先朝長

養幾百年須臾盡付與烏鳶獨能際此志弗憊整
 衣從容向北拜拜畢出門齒賊鋒正色含笑入地
 中妾復從夫僕從主合家老幼無抔土適值有明
 數已終此事無人達九重父老雖傳良史絕遂使
 奇行盡湮滅憶昔巡邊死封疆不失臣節固其常
 史冊猶大書姓字流傳千古人稱異若乃僅一孝
 廉身南可奔黔北適奈必死巴渝弗旋踵雨雨風
 風木已拱忠貞寧不遠古人名獨湮滅與誰論我
 來繫纜江邊樹骨血^被蟻知何處日暮但聞鬼哭
 號或起旋風或怒濤滴酒招魂仍杳杳夜夢難成
 荒郊曉始知節完憾已平騎箕不計身後名余憐
 死事識者寡長歌留俟採風者

送丁郎中守重慶

中丞

田

雯

山薑
德州

老大郎官無一錢一麾出守堂堂去回看瑟縮白
 雲曹二三舊侶愁吟處尖峰萬點烏江斜百蠻社
 鼓萼萼搗春來絕好巴渝景杜鵑鳥與杜鵑花

登白雲山訪僧不遇

何仕昌

九峰山下白雲繞紫翠岩前楓樹杳茶竈烟消僧

未還欲題鳳字無人曉下松山去步遲遲鸚鵡枝
頭逢舊知拂淨石苔同客坐剪將桐葉寄心思

渝州江漲作歌同舍弟守田

江油朱樟鹿田錢塘

龔山礪碣爭聲牙十日五日披陰霞渝江吐納百
川濁秋泉瀦合拖長虵艤臙巨艦盡改岸閣欄小
戶還移家蜀艇送人坐天上飛櫓無蒂誰能挈三
老掉頭不肯住豈羨八月張騫槎我來正值月離
畢閒坐江樓銷白日瞿塘疾雷舟可吞灑灑怒人

髮不櫛峽程嶮遠何時遠百口見屠防小失揭步
誰非父母身焉肯虛舟任漂窆開柁先愁窘路長
鼓柁須謀吉日出吁嗟乎人生坦途未易遭宦海
何地無秋濤妻孥相對不敢哭符牒雨下心旌搖
傳旗所過厨卒走雞犬啁嘶嬰兒號此江須臾過
水信嵌根淺渴皆通漕輕帆一日超下牢眼見撇
捩辭坑壕

王貞女

陳邦器

天地有時忽崩裂全賴正氣頻充塞男兒報國盡

忠忱女子從夫守大節王氏有女洵賢姑毅然獨立勝丈夫閨中報說才郎死絕粒飲冰長嘆吁含淚哀哀訴膝下兒敢敗倫傷風化強顏姑作未亡人願奉翁姑不願嫁緊閉深閨甘寂寞晨昏問寢禮不錯心如止水志愈堅花謝花開任搖落五載方能拜墓前血淚盈盈泣杜鵑寧使秋霜凋兩鬢不容春夢繞孤眠我素留心在綱常表揚忠孝職所當惟願千秋如一日煒哉彤史勿相忘

王貞女

遵義 趙光榮 麟州 守

從古溯芳姬阿誰堪不朽寧推織錦蘇不數九熊柳惟有共姜賦栢舟至今膾炙千秋口巴蜀巖巖百尺城王家有女非人情寡鵠孤鸞初未嫁事親立後何錚錚吁嗟失所天翻欣姪猶子杳杳泉臺不可追那能徒作捐軀死姑嫜白首相依戀得婦如兒悲少閒春風秋月有盈虛雪窖冰天人不變辟如光明燭清光隱隱照幽曲既可耀王公還能照葩屋芳名垂萬年新詩盈尺牘角枕虛陳玉樹摧妝臺不照雙鬟綠又如寒谷冰織塵不染丰骨

清截髮與割鼻後先共崢嶸匪席兮卷卷匪石兮
硜硜寸心惟有天地知豈為千秋身後名古來女
史不多傳何幸渝州今再見潑墨濡毫賡德徽旌
章應出明光殿

禹廟

劉慈

朱甍繡柱臨江渚岸草離離雜風雨氣象塗山數
十重烟火渝州千萬戶禹穴渺茫不可知玄圭陳
錫憶當時江流今古懷明德覽勝捫碑讀古詞

海棠溪

劉慈

清溪窈窕蘭橈輕蕩入溪中烟水平兩岸海棠睡
夢醒一村春釀香風生兒童樹底逐金彈少婦樓
頭吹玉笙亂後淒涼有明月蘆花處處漁歌聲

涵園

今通遠門之蓮花池也

劉慈

相國池中高閣起美人閣上立烟水香飄羅袖舞
輕風幾曲新歌碧雲裏蓮葉田田花亂開水光花
影相裴回簫鼓喧闐江月出啣杯弄月臨高臺此
時大盜如蟻聚宵衣旰食愁明主楚王魚腹福王
脯中原流血無乾土國難民瘼總不知只將睚眦

競雄雌本頭箇箇誇身手蔽日回天山可移豪華
轉眼秋復春涵園不見舊時人招提突兀壓芳渚
夜夜鐘聲聞四隣

王貞女

平樂 曹龍文 石航 邑人

誰能生來不識郎君面誰能永別不使心曲變碧
藕抽絲不可牽菖蒲作花幾曾見悽惻復悽惻
地長悲呼碎我菱花之寶鏡擲我耳璫之秦珠撒
我四角琉璃之斗帳脫我連理錦地之羅襦願向
郎家作厮養朝夕堂前侍舅姑君莫聽陰巖之羈

雌君莫打半夜之啼烏石可爛海可枯綿綿此恨
無時無

四忠吟

曹龍文

有明末造爭門戶賊熾邦危誰復顧我於巴郡數
忠貞先輝後映屹天柱奢酋之禍起倉卒董公自
合來相赴孤軍援絕沈江波英風凜凜牛角沱越
十餘載懷宗末契偷食人牙血磨半年城破三忠
死青天霹靂將如何嗚呼我思四君子或孤或羣
今已矣魚腹刁山安且吉騎箕作厲平如砥一死

尚云負國恩千秋肯望標青史當年宰輔督師楚
與閩徘徊桑梓且投誠此邦獨有四君子轟轟烈
烈殉邊城四公神今在玉京下視愴然見南平渝
江之水何清明嗚乎渝江之水何清明

雍熙碑為重慶太守李公澹園作

合州宋錦在中
牧修武

渝城之側江水中相傳碑見年屢豐一碑肇於漢
京東年深字滅如磨礱宋明先後繼前雄鴻文妙
義從幽風今我太守澹園公兩番碑見豐年同蒼

生有慶逢到隆喜深白叟偕黃童貞珉永勒嘉田
功樂民之樂心無窮民曰太守誠感通維公不有
歸太空願與同人修厥躬毋害農事傷女紅宵旰
憂勞在深宮保民有始須有終勉勉我公功德崇
熙帝載兮亮天工

長句送周梅厓之任龍巖

劍川高為阜守村
牧銘山

去年繫纜字江口多君過從飲君酒談詩說劍躋
名流醉鄉每入無何有今年相見黃金臺咫尺一
杯難到手總為浮名苦絆身驢車日日衝塵走天

生汝我自有真何用金印大如斗而况位置百寮
 底縱能建樹嗟掣肘掣肘亦莫嗟送君去海涯半
 刺且為政碧海看明霞此邦剩有紅螺甲葡桃綠
 酒蟪蛄壓科頭大醉被單袷龍巖老龍為我狎問
 取為霖是何法

舟泊朝天門望塗山悠然有作

大理 顧汝修 息存 華陽 少卿

扁舟晚泊黃魚嶺遙望塗山是故人便欲招我涉
 江去晚烟淡繞江之濱山頭亭子留落照羣峯此

翠何紛綸期以詰朝當著屐縱雨無妨墊角巾

龍鶴坪先生

鹽源 劉作孚 應侯 邑人 訓導

朔風颯颯月無光公倏騎箕歸帝鄉憶公穎異品
 軒昂天生人傑張子房讀書萬卷弗遺忘少登巍
 科名蚤揚初仕太和極邊方先蘇民困免浮糧邑
 稱難治兵弁強公恩冬日威秋霜繼任石屏築城
 隍矣賊旋叛賴巖疆士動論文稱漢唐公遺金薤
 垂琳琅軍興旁午民安康催科不擾樂輸將公留
 竹馬迎龔黃公去頂焚挽寇韁粵東劇郡惟潮陽

公繼昌黎相頡頏崇山大海匪易藏潛擒巨奸掃
粃糠設學制樂正大綱驅逐異學如驅羊修堤鑿
池爲海防雪冤請誅貪如狼橡樹花開步玉堂十
一城士滿宮墻熙熙男耕婦蠶桑十一城民保吉
祥表表政教難盡詳召公遺愛惟甘棠經綸大展
升廟廊鳳凰鳴矣於高岡梧桐終爲荆棘戕上林
無枝棲鳳凰浮雲倏散見君王富貴弗繫乎中腸
請養歸林侍親傍承歡戲舞綵衣裳撫姪如子痛
兒亡孝友可風流遠芳購田賑族文正莊晏黨母

妻樂無殃親友急難如已創掩骨施棺澤汪洋
池鼎新泮水香廟基濶大廟輝煌書院創建力贊
襄育嬰樂施爲衆倡救貧仙術厝善良吾爲體輕
叔和囊善誘後進化猖狂力挽頽風慨炎涼學究
程朱藝王唐詩追李杜文班揚沈劉韻學走且僵
鍾王字法參翱翔性稟乾坤柔與剛出處大節不
可量高山仰止人之望曰維期頤祝壽長關西大
鳥忽飛颺三鳳哀讀蓼莪章九龍灘前徑草荒居
仁埧中蕉葉黃我屬親誼幼同行老情彌篤迥非

常秋移鄉莊束行裝公迎餞別舉壺漿臨歧低首
幾徬徨贈言髮白異蒼蒼境靜身閒心勿忙何煩
勤苦效杜房相離未幾病膏肓寢門握手神悽愴
泰山突爾擺雷破如夢如癡覺微芒已矣寒威凝
雪雱哀猿夜啼我涕滂吁嗟沴氣侵春陽白馬遠
鳴人悲傷年政七十豈爲殤手植三槐後裔昌騰
身汗漫遊八荒下視寰宇歌慨慷塗茗字水羞我
觴公其來格而來嘗

題梅厓憶中崑小影

龍爲霖

中巖之景天下奇三石鼎立青雲齊撐日扶月耀
精魄峩眉空自嫌癡肥憶昔放舟過墓顛尋幽初
步喚魚池牛頭一竅杳莫測珠玉九天泉下垂稜
稜怪石騰虎氣雲龍夭矯鱗之形上方欲到聞鐘
磬石壁精舍咫尺迷徐行得閒穿牛角倏見佛頂
光牟尼老僧手拄紅藤杖揖我入室談須彌雀舌
自起烹活火一洗胸中塵垢滋崑端處處看題識
雲封苔蝕如癩胝夕鳥催人鳴睨曉落花送客吹
參差歸來白日行欲暮惟見江冰澄波璒電光倏

已二十載回首勝蹟猶神怡觀君坐憶之粉本感
我夢想之情思海上三山不可到蓬萊人世時與
期曠懷幽興奮獨往矧乃兩情同依依會當結伴
還攜手共踏青神冰雪溪距羅祇今猶在否試持
木鑰扣靈扉

題梅厓十里梅花一草堂圖

龍爲霖

梅厓居士梅爲骨傲雪凌霜氣芳馥高標不與衆
葩伍興在清溪并幽谷春風十里梅花開倚樹閒
吟嗅落苔沁入心脾透肌骨焉辨爲我爲老梅達

人披圖解其故莫問草堂更何處色香臭味本無
有况乃蓬蒿杳煙霧

張彬儒索指書濡墨應之

龍爲霖

漆書蝌蚪肇倉史蒙恬繼作柔翰起雖悵中山狡
兔泣却便學士晴牕嬉松煤剡藤更煥發能者拈
管爭綺靡鄙人變法出新意遠徵似不如近取布
肘知尺指知寸曲直短長吾身自具有規矩以指
代筆較省事遊戲人閒聊爾耳友朋傳說競詫異
綿包繭裏任猜擬張子苦欲求面試特具壺觴儲

墨紙幾經袖手竊汗顏旁觀巧匠偏聳企強起乘
醉一狂揮四顧差若無人矣蛇蚓蛟龍邴復計惟
聞指閒颯颯驚風雨須臾掃盡默自笑恍如畫腹
與畫被傳視漫嗤雕蟲技今朝也足博雞雉頭濡
未敢學張顛指動聊希逢異味此筆由來天所賜
畢生用之無成毀諸君但肯羅列多殺以酒招寧
辭磨甲禿爪向清几長槍大劍本無志老來亦厭
毛錐子祇恐視如回道人謝却黃金索吾指

荔枝謠 用東坡韻

龍爲霖

海山仙人絕塵埃長夏將熟南薰催絳襦玉膚中
單紫風骨自是天上來此種近雖推閩海江州漢
代歲爭采太守宴會久廢置空教盛事傳千載

漢時

郡城南岸荔枝熟
太守會宴官紳

我生始嘗自廣州色香臭味轉

思涪美人破顏何足怪至今猶憶嶺南遊歸來林
下伴諸子嗜痴偏愛尋瘡痛聞說販峯產尤物山
僧寶之如上瑞自從春半樹初芽已約相過興倍
加還愁飽食增內熱豫囑活火烹新茶誰期惡鳥
先人奪碩果不留何望耶我輩明年若訪瞿曇家

莫待結實聊采華

豐年碑

龍爲霖

渝城西峙江水東其北磐石臥水中石紋龜折各
異相如人如物紛濛濛或如碑碣長且濶一一布
置胥天公江水涸極始一見百穀穰穰兆年豐自
漢以來代有紀惟明所誌小異同謂弘治閒嘗畢
露西成靡慶翻苦凶戒人勿侈吏勿弛此意良厚
詞匪工乾隆庚申歲二月忽傳碑見適感風臥聞
古篆不可辨孤懷遙結時忡忡小愈亟命肩輿往

由來八分半朦朧汲水瀦制泥沙淨甫識紹興鐵
畫工深鐫更冒以鐵汁依稀剝落如蛙蟲唐碑晉
刻渾不見况覓漢篆久無從世閒何物能不朽觀
茲感嘆悲填胸其後三秋歌大有豐年之說洵匪
空太守李公爲作記欲佐郡志傳無窮余亦賦詩
并贅跋揮毫含笑追古風一物悲喜頓殊態情隨
時變胡強同獨怪坤維多異事頑石偏司造化功
歲甲戌春碑復見傳聞雀躍走兒童比年水旱疊
爲患私心久竊憂爨爨得此爲吾桑梓慶坐見盈

巴東志 卷一 三
寧比戶封同儕把筆爭題詠太平有象吾其逢明
朝挈伴試學晁馮輩莫畏江風吹蓬蓬

同人訂於二月十三日登塗山澄鑑亭觀渝城

夜景爲寒風所阻悵然有作 龍爲霖

渝城之景本奇觀向夜何當更遠看燈火萬家懸
一葉秀色重重真可餐龔山絕頂凌天漢孤城遙
對好憑欄結伴相期戴星往齊心同訂月十三詎
意連朝風獵獵欲往從之多苦寒踟躕咸結封姨
怨朋儕相聚難爲歡縱有花朝酒千斛終負遊人

興一團兼聞山僧儲香積掃榻待我話團樂三五
日閒會晴霽要須奮袂躋天關長江只隔衣帶水
逡巡胡爲辭往還試一臨之乘皎月澄鑑亭空四
望閒全城夜景紛在目窈窕繁麗爭盤桓庶俾塵
襟一乍滌風露雖饒酒有權不然匪惟孤寺野衲
長悵望翻恐山靈嗤我頑

兩江爭漲

龍爲霖

渝州雄勢古無兩雙江會擁孤城上兆姓浮家蹲
片石巨靈跋浪抵一掌水落三冬常激灑桃花春

漲差滉漾此消彼長雖互讓入夏已聞戒舟槳有時合勢駭洶濤何異滕薛爭雄長主賓更無禮可擇蠻夷江性恣一往城如片葉隨波盪右衝左擊眞潏沉兩厓渾莫辨馬牛千艘直恐淪象罔憶昔莊周誇河伯召南詩人歌漢廣豈如此地兩江齊湧出怒掃荆襄同臂攘好乘長風破遠浪瞬息千里若尋丈銀河直上問取支機石歸向巴人笑說天門開蕩蕩

春日渡江會飲體仁書舍因遊海棠溪諸園抵

暮而歸

龍爲霖

春陰初到海棠時海棠溪畔鬪芳菲張子移家就溪住何用招客谿爲媒花時挈伴渡江去殺核已具牡荊肥夙慕沿溪多勝概盍往觀乎酒且遲行行漸喜幽徑窄修竹芳華探翠微紅如丹砂碧如玉紛紛點綴周四圍盤桓厭飫日旁午還來就酌豪興滋旣傾竹葉酬花惠便引花光入酒卮暢飲高談競未了更餘戲劇供指揮尋橦度索看童女往來直似凌空飛方期歷試窮巧技從人忽報日

斜暉出門欲往招舟子聞說向氏倚蘭奇回頭徑
 自入芳圃無人門焉空葳蕤看竹原毋須問主矧
 逼暮景將依稀迅偕同人尋返權江心猶覺香風
 吹人生如寄貴適興春朝况值百華翻君不見杜
 牧齊山開口笑菊花尚插滿頭歸

巴蔓子墓

邑令 王爾鑑

穹窿哉蔓子墓渝城巖石封固多少王侯將相陵
 寢穴樵兒獨此屹立兩江虹勢迴盤護頭斷頭不
 斷萬古鬚眉宛然見城許城還存年年春草青墓

門君不見背弱主降強主斷主之頭獻其土又不
 見明奉君暗通隣求和割地榮其身惜哉不識蔓
 子墳

謁三忠祠

王爾鑑

明季之世乾坤裂獻忠禍蜀更慘切夔門一破趨
 渝州佛圖失險肆攻劫荒墳凶具資賊兵揚屍負
 戴城爲穴一烘城陷通遠門內乏齋糧外援絕卓
 哉陳撫士奇與二王郡守行儉 疾志報國守貞烈或
 掉常山舌或噴侍中血舌斷血枯魂猶結身死尚

恨賊不滅忽驚皎日霾復雷怒乎助乎天平天平
不可測嗚乎自古皆有死泰山鴻毛究別白貪生
順逆寧久生一死名污永難雪三靈雲際賓帝鄉
千秋正氣表奇節我來瞻拜肅冠裳祠外江聲走
嗚咽

巴民望雨謠

王爾鑑

巴之民叩天公雨我珠雨我玉不如雨我粟天雨
粟不可食不如雨雨與雨雪雨雨雪粟不竭勝
似蒼天雨珠玉

巴民喜雨謠

王爾鑑

巴山高巴山低高者望天雨低者賴堰溪有時亢
陽火龍怒掣乾溪復弗雨老農空拍手兒童擊田
鼓汲龍潭告田祖霎時雲合電掣殷其雷火龍走
青龍回旱魃去少女來掀海波灌田隈巴之民真
快哉今年穀定滿竹園好與老小鄉里高坐田坎
把酒杯

勘盜

王爾鑑

若窮窮乃盜若窮胡乃盜傍幽陰而施毒似魍魎

而暗嘯嘯雨兮弄烟滅靈地兮蔽蒼天盜亦天地
父母之所生兮豈不知天高地厚母慈父憐將加
之斧鉞與抑潤以膏泉我求其故而不得獨兀坐
以盤旋

龍藏寺

俗傳明建文帝避難於此

王爾鑑

憶昔燕王靖難兵南下直擣來金陵宮中一炬烽
煙起國亡與亡帝已死如何蜀粵滇黔閒影落江
湖到今傳當年妖僧縛大內贖詩已燬伏其罪老
佛之號殊荒唐此地猶說龍潛藏四山雲幕水幽

咽望帝魂飛杜鵑血龍譙遠吊金陵宮古寺喬木

空秋風

余按屈晦翁弱水草堂詩註述兩京求舊錄云
金川門之變建文闔宮自焚野史紛紛以思恩
所獲僧楊應祥訛為楊應能又以太監吳誠訛
為吳亮且隱應祥之斃獄而云老佛迎入西內
又傳葬之西山陸文裕云葬金山鄭端簡亦云
然薛方山憲章錄云正統十二年廣西思恩州
獲異僧即建文也云云亦不言偽實錄云正統

五年有僧年九十餘自雲南至廣西語人曰我
建文帝也張天師言我四十年苦今數滿宜返
國詣思恩自言土官陳英執送總兵柳溥械至
京會官鞫之姓名楊行祥都勻人洪武十七年
度爲僧上命錮錦衣獄而死同謀僧十二人俱
戍邊三說不同但是歲吳誠坐征麓川失利論
辟宥死又崇禎中鞏都尉永圖請以建文帝入
祇典思陵曰建文無陵從何處祭論者謂可祛
西山不封不樹之訛况建文以洪武丁巳年生

至正統初不過六十餘歲而楊行祥自稱九十
餘假托立見不待辨而明矣予在燕訪之近景
陵處竝無疑塚可指爲天下大師墓者昔憲宗
身爲景帝所廢英宗復位貶爲郟王不葬天壽
山乃憲宗卽位猶爲復號起陵可謂以德報怨
建文帝太祖嫡孫授受明正果有墓在不爲建
陵必無是理遜國記述建文帝出亡始宮中至
吳江明是僞撰全不知本朝典制所稱官秩皆
國初所無且多里巷小說然名士輩亦往往傳

巴東志 卷十五
道者蓋人心本不平一聞此語樂爲口實以快
意不讀書者聞之既久遂成典故谷應泰紀事
本末據爲正史疑誤將來不淺 余向讀田山
置黔記亦詳辨建文出亡之訛附此備考

鐵山見焚林開石者而嘆之

王爾鑑

維地之平藝五穀維山之峻樹材木蓄梁棟牧禽
畜裊風雲障平陸峙天豎地何轟轟蟲蟻蠕動氣
相屬胡爲伐木燎其毛剝石撐其骨童而山頭卻
無肉蟻穴蟲窟無遺族不見青山真面目啾啾風

雨神鬼哭

觀音峽

王爾鑑

一葉舟入觀音峽咄嗟幽森驚怪石蜀中水石佳
且多未見如斯塚壘糾錯之奇格有時欹斜有時
立勢如張弩又列劍戟我每觸之神魂虩厚者薄
耆相矢碑闢之闔之闔復闢大力者誰用手撫左
旋右紐紛如劃忽見洞府開幽深疑是坤軸坼水
雲石影吞吐之出沒變化蛟龍宅旋見瀑布垂雲
竇噴出石津液穿林挂磴聲珊珊濺雪飛珠光白

白雲根股雷幾千尋峯尖插天不盈尺峽中九秋
氣未寒兩壁青蒼循石脈目不暇給舟已過回首
峽封江天碧

自佛圖關夜行至白市驛

王爾鑑

只爲磨崖刊詩句摩挲不知江山暮桃源洞口漁
父迷點竹燒松照行路石磴懸山曲復曲舉足蹻
跚每却步奚童背我笑我痴輿夫對我嗔我固胡
爲白晝不肯行夜半雞鳴不得住半生坎坷任所
之今日夜行亦有數况乃夜行山水閒冥心復獲

靜中趣時斷時續聽溪聲若隱若現看雲樹前途
白市路匪遙奚童輿夫莫嗔怒休肩打開酒家門
酣爾邨醪洗煩慮我亦高枕臥羲皇一夢蝶飛自
來去

重宿白岩寶輪寺

王爾鑑

龍隱之山高以矗雲樹爲衣石爲骨一峯峭削齒
江波兩腋滌洄帶溪谷石磴蜿蜒穿竹林懸岩斷
壁開天竺息我形勞一再至披雲每假僧房宿岩
端天籟吟松風夜半江聲走帷幄我生半百埋塵

埃欲遣遊踪遍四隩聞風風遠挹青林瀛島芝香
薄海曲仙都緣淺不能到跡寄一隅日鹿鹿茲憩
空門心亦空靜言思之識大樸一卷一勺藏化神
况迺長江撼山麓風來馥馥天雨花瀾轉紆紆地
旋軸一息神與造物遊八荒無事點塵足嗤彼邯
鄲心何迂卻憐蝴蝶夢非促詰朝笑與山僧話且
共提筐采山菊
自九日登望江書屋遠眺
五日會病足九日須病目平生兩眼飽溪山豈是

耶裏溪山巨嶂觸目病尚非不能視還思登高延
遠矚滿巖秋色香風生拾級高登望江屋江上青
峯排眼來眼中雲捲江山綠金篋不須刮尼珠可
共燭渝山渝水有夙緣憑高縱目醉黃菊
介石早登喜雨

昨夜詩催雨今朝雨催詩奔雷掣電何淋漓大珠
小珠飛參差遠山雲暗近山低坂田水向溝田移
界道泉飛溜而澌懸岩瀑布虹影垂臥者已起槁
者滋煙籠竹樹雲迷離農夫拍手歌農歌牧童牛

背唱竹枝老夫狂喜不自勝倚馬敲鐙爲賦喜雨
辭

川東道署古黃葛樹長句

王爾鑑

維山有木資梁棟維木有材世所重
榿楠杞梓松栢桐匠石得之慰禱頌
倘易其地弗能良弗得其所難爲用
羅致恐被鳩庀傷酣林羞與凡材共
惟茲黃葛鍾氣雄盤結魄磊儼神工
拔地本聳屹山嶽憑虛根起蟠虬龍
幾經雨露與霜雪柯古不改排長風
密葉天覆曖蒼蔚萬閒廣厦青陰濃
斧斤

不創衆材遂無爲之鄉非正論堅心
不容螻蟻穿老榦豈受風雷震爲溯厥
初不計年疑歷無懷與葛天笑他蒲柳
霜一折擬彼靈椿壽八千風月於今慶
有主朝看曳雲暮霏雨高枝凡鳥不敢
棲看擢椅梧待鳳舉

將軍行

併序

將軍行者爲贈提督署重慶總兵任公作
也公諱舉字某某山西大同人甲辰武進士
楮面長髯素具忠義志才勇過人任固原遊

擊時值兵變公手刃數人兵乃定乾隆十二年大金川蠻會逆命擢公副將晉署重慶鎮總兵督兵進勦山谿險阻雨雪淋漓公舍馬徒步戰必先登首襲昔領扼其吭又取噶達達喇木岡等十餘處卡崙竝破木石城及礮樓二百餘座進兵色兒力山梁逼近賊巢賊奮天避其鋒退守石城不出公念士卒久戰力疲欲圍困蓄銳以待旋被帥令促戰提刀奮起督陣乾隆十三年六月十六日躬薄卡前一

踴而上連砍數賊賊鎗暗從腋下穿過後脇鮮血橫濺遂墮崖陣亡在籍有七旬老父繼妻施夫人年三十餘二子俱幼事聞

皇上憐之贈秩提督召見其八歲兒賜多金錫廕
皇太后

皇后召見施夫人厚賞珍物以歸斯役也破松林口首挫賊鋒陣亡者有李遊擊成邦河南鄭州人闢卡撒大營力戰進襲薄賊石卡陣亡者有買叅將國良四川西昌人馬爾邦山破

誘盡以兵械與賊束手而受坑者則副將張
興也等死耳而死異矣

將軍代北之豪士少蓄沉謀有大志一自韜略獻
金闕以身許國心無二先於固原手亂兵旋向金川
樹節義金川土酋嘯蠻烟崖高刮耳上參天危巒
密箐行無路堅礪負固年復年士卒委靡無鬪志
主帥心貳相猜嫌將軍一至振奇氣每逢戰壘身
當先何必柵營規細柳奇正因心宜左右扼吭先
取昔嶺隘分卒復擊木岡肘傳呼遠應山谷鳴鼓

輦近撼風雷吼誓言不奪刮耳崖父母妻子非吾
有五月六月寒雪風漫漫雨雪山萬重舍馬徒步
攀石磴穿林披棘搜蠶叢小大礪破二百座旦晚
色力山梁空蠻酋胆寒鼠巢穴堅守石城計已窮
天子將軍沉機欲久困不勞而取爲上功夜半催軍大
羽箭怒責將軍不急戰將軍被催自沉吟提刀而
起發長歎人生怕死非英雄成敗得失何足算曠
目橫砍死酋蠻奮勇先登上絕巘千營月冷帶蒼
芒鎗弩齊聲如雨電陰被鎗從臍脇穿墮看崖染

紅血濺大星昨夜墮前營造化無力神鬼驚搶得
屍歸裹馬革寒雲陰護鬚眉橫卻歎古稀有老父
妻弱子幼泣風雨將軍死忠即死孝厥功不成厥
名著當事援情為上書

天子曰都真丈夫八齡稚子召上殿撫摩廕錫加恩殊
嗚呼自古何人不有死泰山鴻毛迥難比將軍一
死萬年生誰堪從者買與李不見馬邦被誘全師
傾彼亦死者羞張興

張關行

邑令袁錫夔石堂六合

渝州門戶東鐵山又東四十里曰張關嵌嶺撐天
半隱見石逕蜿蝨曲如線盜名竊姓誰氏子元季
張坤蛇豕此殺人投溝溝水赤惡名至今驚旅客
明初大帥斬關入新鬼舊鬼同驚慙厥後六合渾
為家道通夔荆與梁益沙溪瓦店三十里行人不
見居人跡小醜林閒肆剽掠奪囚一去難追獲我
來官此心煩憂戍兵茶店督護周上請大府報曰
可甌脫相連士番休萑苻既靖客心壯風雨無驚
魑魅愁屋外荒土二百步捐買與兵作園圃數年

蟻附十餘戶百姓創作新興舖兵民相倚永相安
種梁菽麥縱橫布絕險如初道不梗試看行者歌
於路

牛角沱弔明殉難司馬董公

周開豐

櫂槍夜見犯井鬼東流妖氣衝天河小醜逆謀一
朝發駕言尅餉生風波智勇倉卒失所指巖疆頓
爾為賊窠分出肆掠且招叛合陽岌岌無人呵公
久家食赫然怒入城調度先人和傾貲召募應聲
集荆聶賁育歸網羅酒吞賊眼殺賊吏甲則犀兕

鼓則鼉忠義感人士爭奮誰弗踴躍雄且多一怒
螳臂悉摧折八公草木皆兵戈順流東下紆郡難
眼看蟻蝨真么麼仰攻佛圖擣賊後意欲毆之殲
盤渦惜哉孤軍內無應義勇崩潰遭坎坷王化園名
祭忠駐師旅何意翻成落鳳坡大星西隕公隨逝
水伯江神迎玉珂嗚呼大節窮乃見陽九之來公
柰何况居林下無官守保障北道功誰訶世有全
軀保妻子輻葛不斷如藤蘿鞠躬盡瘁公獨死空
遺茅舍蘭溪阿於今事近二百載忠魂毅魄天相

磨懦夫壯士聞風起舟子樵人歛衽過江干巨石
巖巖立大書特書何嵯峨天長地久公未死風餐
雪虐石難頗愚生也晚常經此一回憑弔千摩挲
整衣太息還再拜金風瑟瑟聊悲歌灘高水激山
鳥噪公或遊兮江之沱

荔枝謠

用東坡韻

周開豐

山風吹淨野燒灰陽春雨露交相催炎天過半荔
子熟萬顆珠從赤帝來珠光燄燄綠雲海昆蟲懾
伏須人采胡然一朝蠢動肆猖狂喬柯難望踰百

載此子當年至雍州剷山堙谷始於涪爾蟲想是
飛馳卒含冤聚族魂羣遊於今思藉歸環子橫致
此邦以瘡痍坐令鹿苑皴皮生蒙殃無自可稱瑞
嗟乎福有基兮禍有芽高翔黃鵠繳猶加况生天
質美無度茅君爲輟穆沱茶樹旣無有蟲亦滅大
雄所重能捨邪我聞羅浮是汝家何不歸去酒田
伴梅花

豐年碑

周開豐

嘉涪合流來渝東爰有磐石水爲宮石上古碑非

一處舊傳見則年必豐江神慳妒不易出沉沉羃
羃泥沙重在昔水落石盡出傾城爭赴童與翁鶴
坪好古急往視洗之剔之發其蒙市人如堵求辨
識復爲手錄成一通北有碑形杳無字明刻雖異
存深衷宋碣八分特完好觀者晁張李與馮大有
之說不我誑豚蹄弗用卮酒供晁言始事自建武
惜與晉唐皆冥濛乾隆之初庚申歲歲星垂照光
熊熊於時碑出符往載作記徵詩太守公太守蔚
州李公
厚歷今倏忽踰一紀春波洗出臥水虹雖存泥滓

未加濯規模宛爾開心胷比來苦歎嗟婦子錫以
稔熟資天工先後印證知不爽當復有秋何異同
飽食煖衣忘帝力量晴課雨康田功噫嘻此碑宋
賢題識惜往古余也撫今思無窮峴山漢水兩歸
盡瘞鶴銘沉江水中將來深恐百餘祀碑亦變滅
隨江風史官未卜記與否徵諸吾詠非雕蟲

王貞女

周開豐

朔風捲地同雲黑紫電螭蜷起冬月天上玉樓新
落成下索人閒好筆墨列仙狀薦靈祇催逼取才

人壯顏色致折生成連理柯前年遂見曾生踏天
作玉樓將柰何鶴怨鸞驚事正多相莊鴻案期相
守况復牛郎未渡河爲憶牛郎初聘時兒女因緣
心各知只今未見桃天信先已吟成別鶴詞冰雪
之性天所付幽明雖異精神注堂有翁姑家有親
愛兒安忍易其素歸來子舍莫游移彩衣屢舞娛
衰暮年去年來幾度秋高堂私喜近無愁眼看稚
子扶床走婦職粗完未解憂東流水日滔滔頽
波泛濫江之皋木落山空何蕭瑟欲往從之心勞

切忽聞暗香出叢薄如雪梅花寒未落天教正氣
回陽春貞女高風滿寥廓

晚宿金鼇寺

集太白

周開豐

明月看欲墮流光滅遠山衆鳥各已歸孤雲自去
閒移花坐石忽已暝使我不得開心顏琴松風兮
寂萬壑別有天地非人間

弔明殉難太守章公

有序

劉會

公諱文炳知重慶府土會奢崇明叛公死之
日百姓以身翼之者數圍旣被害會旋復歎

曰吾悔殺廉吏

妖氣夜見犯井鬼土會倏叛殊猖狂倉卒死難官
非一百姓獨憐太守章重重圍公以身翼冀賊無
害吾忠良賊欲捨公爲民望留之恐變生非常枉
殺廉吏卽悔過賊也公論亦難忘縱爾捨公公必
死豈忍偷生於賊傍合陽董公赫然怒師收捐驅
歸帝鄉獻賊繼起城復破三忠同日殉綱常後先
死難心無二忠魂毅魄相頡頏吁嗟乎公來守渝
知幾年政教俱難考其詳民愛賊悔生死際廉兮

廉兮長留芳猿啼鵲叫人悲傷天清地朗公翱翔

同人約登塗山澄鑑亭觀渝城夜景爲寒風所

阻悵然有作

張以穀

平生山水非慳緣每逢佳處頻追攀一壑一邱且
如此况我塗峰尤大觀澄鑑亭中俯通郡勝於萬
里尋金山雙泓夾城抱元氣一葉浮江翻碧瀾天
成形勝古無匹雄偉何須跨錦官誰識夜景更奇
絕烟樹樓臺有無閒萬家燈火爭夜月遠浦涵光
星斗寒二三同人期立賞都云此日可同看假以

良辰踞其地飛觴嘯傲將夜闌不分天公慳我興
胡乃春風霏雪團颯颯不休連日夜渡江之興都
闌珊事已垂成忽中變古今如此徒實繁絀推物
理須行樂杜老恐亦凋朱顏梅厓許我有神啟周
正 彬儒責我成虛言張彬 爲功爲罪孰與定鶴坪
一語歸諸天龍鶴 寄語山僧宜少待會須觴詠相
逃禪掀髯不羈者誰子幸勿旁觀嗤張顛

春日渡江飲張體仁書舍因遊海棠溪諸園薄

暮而歸

張以毅

張子體仁有高致不居城市居江湄自謂平生非
隱淪如何偏與山水私斗室乾坤足大觀江城如
畫爲藩籬吾儕心折更有慕海棠溪景素相思今
日惠風最和暢張子折柬招遊之春波瀾瀾須臾
至賓主諧笑如屑霏盤餐且勿遽羅列往探奇勝
羣攀衣水複山重不二里蠟屐翩翩入翠微陸離
奪目花滿徑就中特啟雙柴扉未須有酒先已醉
欲留不留且言歸歸來命酌書堂上興酣搖岳觴
頻飛又赴向圃尋幽致蘭芷松桂娛春暉將擬盤

相終永日舉頭斜照殊依稀理楫歸來燈火燦不
寐爲賦春遊詩

上巳同人遊覺林寺小飲限七字韻

張以穀

月前塗峯約已失天晦廣寒月不出豪興聯翩嚴
過之獨向窻前弄閒筆所欣修禊佳節來酌我塗
山事可畢鶴坪先生尙未歸竹溪之友無須七試
爲理楫浮春江覺林正是維摩室亭名在昔梅厓
題追憶高情事堪述搖岳驚天興豈狂飛觴曲水

意真密僧談時復露機鋒客言安用評甲乙窻外
修竹與茂林鳥語花香紛促膝右軍當日樂蘭亭
未識至今誰與匹舉頭義御在崦嵫別有天地容
吾逸揮手行歌入郡城何異仙翁藏大橘主僧繼
綬問重過不必遙遙先卜日

豐年碑

臨湘令王清遠 字曙邑人

城東門外水深深城西水內石窿窿形如盤孟平
而濶年年苦被沙泥封神鬼於此勤阿護歷朝鑄
刻紛不同攷自紹興迄弘治誰歟姓氏晁與馮八

分一通獨完好旨以鍊溜堅益工惜哉晉唐渺遺
蹟建武之號先磨礮世閒何物堪不朽恃有後人
相始終聞道乾隆庚申冬水涸碑見驚創逢鶴坪
先生急往視親爲洗石大發蒙七字長誦猶未足
作記還留郡守公當時瑞兆不虛耳家家社鼓酌
年豐屈指今已十四載天時人事慨何窮君不見
金會跳梁擾全蜀前年軍糧惟自供又不見吳楚
艱食旋督採去年官運連艘艤頃傳碑見歡士女
及余探尋迷失踪一望瀟漫隱倏忽豈亦有數存

其中春日春風吹古渡物象熙熙天象融守土勿
重爲民慮但須攜酒時勸農到得秋成盈萬室持
此可以答 宸聰

春日渡江飲張體仁書舍因遊海棠溪諸園薄
暮而歸

海棠溪水香清漪遊人不斷傳昔時張君買山故
先我及邀社友猶陪追二月春風吹古渡江空城
影垂參差一幅畫障渾難寫羨君自在收階墀臨
期已別是天地剛欲呼酒同賞之不道臞仙引客

興花田去去寧教遲沿溪縈絡看次第隨手點綴
俱相宜修篁娟娟覆幽草怪石儻儻蹲曲池由來
主人不須問移樽好但酌花枝促回飲罷別溪上
暮色蒼然撲宇眉橫舟掠岸掉頭望夕烟籠水妍
尤滋人世武陵不爲滅妙處一一堪尋思試問從
前往來客無耶有耶知未知

巴子石

孝廉王汴子澹
盧氏

君不見江州縣中拳拳石纍卵錯落相堆積雨雪
風饑年復年苔色斑剝無崩磔好事者徒繞以闌

傳聞掘地深千尺不知此語誠然不幽邃應通蛟
龍宅蛟龍之窟蟠奧府下與地軸相絡繹神物有
靈爲呵護胡乃簷下處偪窄深山大澤氣蜿蜒物
得所聚嘗千百寶遠於人斯爲貴精光不沒時奕
奕出與不出待其時耳目玩之何由得此石豈其
大隱流置身廊廟全高格頑堅不作礎砌材古穆
疑是商周質女媧煉補荒天餘或墜塵埃成奇魄
星隕化石傳有之二十八宿君何籍兒童不識有
大器指點顛末空嘖嘖石乎石乎貞厥操四十八

峯爲莫逆沃之以酒酬以詩此中不須有光澤大
椿未老桃李枯孰是孰非未可摘撫摩豈少吟詩
人就中誰是襄陽客

水獵行

王 汴

孟冬江濤勢猶漲將軍水獵巴江上沙岸人集紛
絡繹小艇如梭殊蕩漾老漁立船頭耿介若大將
漁子揮兩槳全力催一舫魚鷹猛鷺白獺馴隊成
鵝鸛森相向須臾一麾下波濤鷹飛獺奔恣跌宕
縱橫欲踏蛟龍宅鼉鼉蹯蹯魂魄喪何異蹂躪開

山林駭兇驚虎奔兇象風雲震動疑變色淵底搜
羅神益王乍出極浦呼其羣更跳江心狎巨浪掀
波振躍人齊呼奏功獻獲誰能讓大魚潑刺不肯
降小魚鰓鰓聽肆掠獨力不支衆相之共舁遙見
鼉鱓狀前者得魚復入水後者激發更逾壯堆積
如山半死生大索煙波矜奇况暴殄天物古有戒
取樂斯須亦云暢將軍一笑賞漁人江水烹之佐
佳釀更分餘惠及同儕略如苗蒐習兵仗獺飽安
眠鷹曬羽夕陽一抹來漁唱

覽勝亭長歌

川東
道 張九鎰

清秋一抹天光融塗山齒翠撐晴空牽輿似駕長
虬上仙颺吹落金芙蓉芙蓉萬朶疊蒼翠渝城一
葉宛居中兩江合抱迅如箭軒然大波來洶洶憑
高御虛幾千仞仰天長嘯驚鴻濛我家衡嶽麓山
側迴環七十有二峯昨年足踏祝融頂日光盪漾
扶桑東須臾明滅不可識萬頃雲海羅心胸登茲
危亭景彷彿煙雨妙態摹難工舊額澄鑑書大字
面目假借非真容如此山川足遙睇易云覽勝無
雷同從事太守大叫絕更促豪句輝龍從返照金
烏銜半璧龍吟澗壑生長風挈舟江面復回望皎
皎涼月磨青銅

川東

張九益

巴縣志 卷十五 覽勝亭張敬 川東 張九益

